

შპს თბილისის დავით აღმაშენებლის სასწავლო
უნივერსიტეტი



სტუდენტების, ადმინისტრაციისა
და აკადემიური პერსონალის სამართლებრივი
უფლება
მოვალეობანი

1. სამართლიანი მოპყრობის უფლება

თავისი საგანმანათლებლო მისიის შესასრულებლად სასწავლო უნივერსიტეტი შეიმუშავებს წესდებას, შინაგანაწესსა და საუნივერსიტეტო ცხოვრების მარეგულირებელ სხვა წესებს. სასწავლო უნივერსიტეტის მიერ დადგენილი ქცევის წესები და სტანდარტები უნდა უზრუნველყოფდეს სამართლიან მოპყრობას სასწავლო უნივერსიტეტის საზოგადოების თითოეული წევრისადმი. სამართლიანი მოპყრობის პრინციპი გულისხმობს სასწავლო უნივერსიტეტის ვალდებულებას, ნებისმიერი ფუნქციის შესრულებისას, რომელსაც ის თავის თავზე იღებს სწავლებისა და აღმზრდელილობით დარგში, უზრუნველყოს სტუდენტებისა და აკადემიური და ადმინისტრაციული პერსონალის თავისუფლებისა და ღირსების პატივისცემა.

2. გასაჩივრების უფლება

სასწავლო უნივერსიტეტის ძირითადი დანიშნულება სტუდენტებისათვის მაღალი ხარისხის საგანმანათლებლო მომსახურების უზრუნველყოფაა. ამისათვის სასწავლო უნივერსიტეტი ვალდებულია, ხელი შეუწყოს ისეთი სამუშაო და სასწავლო გარემოს ფორმირებას, რომელიც შესაბამისობაში იქნება მის საგანმანათლებლო მისიასთან. საჩივრების ეფექტური სისტემის არსებობა სასწავლო უნივერსიტეტის მართვის პროცესში არსებული ხარვეზების აღმოჩენისა და აღმოფხვრის ძირითადი მექანიზმია.

სასწავლო უნივერსიტეტი ვალდებულია, უზრუნველყოს სტუდენტების, ადმინისტრაციის, აკადემიური პერსონალისა და სხვა დაინტერესებული პირების უფლება, გაასაჩივრონ სასწავლო უნივერსიტეტში მომუშავე პირების უკანონო და სხვა არამართლზომიერი ქმედებები, აგრეთვე მიიღონ მიყენებული ზიანის სრული ანაზღაურება. ამის მისაღწევად სასწავლო უნივერსიტეტი ვალდებულია, შეიმუშაოს საჩივრების მიუკერძოებელი და დამოუკიდებელი განხილვის ეფექტიანი საშუალება. საჩივრების ეფექტური სისტემა უნდა ემყარებოდეს შემდეგ ძირითად პრინციპებს:

- წამოჭრილი პრობლემის არაფორმალური მოგვარების მხარდაჭერა;
- საჩივრების პროცედურების ხელმისაწვდომობა;
- საჩივრების პროცედურების სიმარტივე;
- გონივრული და მკაფიოდ განსაზღვრული დროის ფარგლები საჩივრის განხილვა/გამომძიებისა და გადაწყვეტისათვის;

- საჩივრით წამოჭრილი საკითხების სამართლიანი, სრული და მიუკერძოებელი განხილვა/გამოძიება და გადაწყვეტა.

ხელმისაწვდომობა და საჯაროობა - სასწავლო უნივერსიტეტში მოქმედი საჩივრების პროცედურები საჯარო და ფართოდ ხელმისაწვდომი უნდა იყოს. თითოეულ დაინტერესებულ პირს უნდა ჰქონდეს შესაძლებლობა, მიიღოს ამომწურავი ინფორმაცია თავისი უფლებების, სასწავლო უნივერსიტეტში მოქმედი საჩივრების სისტემისა და პროცედურების შესახებ. ინფორმაცია საჩივრების პროცედურების შესახებ უნდა გავრცელდეს სტუდენტებსა და პროფესორ-მასწავლებლებს შორის სასწავლო უნივერსიტეტში სწავლის ან მუშაობის დაწყებისას, ასევე გამოქვეყნდეს:

- სასწავლო უნივერსიტეტის ვებგვერდზე;
- სასწავლო უნივერსიტეტის შენობაში თვალსაჩინო ადგილას.

მნიშვნელოვანია, რომ პრობლემის წარმოქმნის შემთხვევაში სტუდენტებსა და სხვა დაინტერესებულ პირებს ჰქონდეთ დროული რჩევის მიღების შესაძლებლობა სასწავლო უნივერსიტეტის ფარგლებში წარმოქმნილი პრობლემის მოგვარების საშუალებების შესახებ. ამისათვის სასწავლო უნივერსიტეტმა უნდა უზრუნველყოს ყველა დაინტერესებული პირის შესაძლებლობა, გაიაროს კონსულტაცია სასწავლო უნივერსიტეტის მიერ სპეციალურად უფლებამოსილ პირებთან. ასეთი კონსულტაცია კონფიდენციალური უნდა იყოს და არ უნდა ჩაითვალოს ფორმალური საქმისწარმოების დაწყებად.

პრობლემის არაფორმალური მოგვარება - შპს თბილისის დავით აღმაშენებლის სასწავლო უნივერსიტეტი არ არის საგამოძიებო დაწესებულება. საჩივრების სისტემის არსებობა და მის საფუძველზე გარკვეული გამოძიების განხორციელება სასწავლო უნივერსიტეტის მიერ თავისი საგანმანათლებლო ფუნქციის შესრულებას ემსახურება. გარდა ამისა, სასწავლო უნივერსიტეტის ეფექტური ფუნქციონირების ძირითადი პირობა სასწავლო უნივერსიტეტის ადმინისტრაციის წევრებს, აკადემიური პერსონალის წარმომადგენლებსა და სტუდენტებს შორის კეთილგანწყობისა და ნდობის მაღალი ხარისხია. შესაბამისად, ფორმალური საჩივრის წარდგენამდე ყველა დაინტერესებული პირი ვალდებულია, წარმოქმნილი პრობლემის გადაჭრას თავდაპირველად არაფორმალურად, სადაო საკითხზე პასუხისმგებელი პირისადმი მიმართვის გზით შეეცადოს. გამონაკლისია შემთხვევა, როდესაც ხდება უფლებებისა და თავისუფლებების უხეში დარღვევა, დევნა რელიგიური, ეთნიკური ან სხვა ნიშნით, ან როდესაც ნებისმიერმა დაყოვნებამ შეიძლება მნიშვნელოვანი ზიანი მიაყენოს პიროვნების კანონიერ ინტერესებს.

ამ შემთხვევაში დაინტერესებულ პირს უფლება აქვს, პირდაპირ წარადგინოს ფორმალური საჩივარი. საჩივრების განმხილველი ორგანო - სასწავლო უნივერსიტეტის წესდებით გათვალისწინებული წესით სასწავლო უნივერსიტეტში საჩივრებს განიხილავს უმაღლესი განათლების ფაკულტეტის საბჭოს წარდგინებით აკადემიური საბჭო ან მის მიერ შექმნილი კომისია. დაუშვებელია, საქმის განხილვა/გამოძიებასა და გადაწყვეტილების მიღებაში მონაწილეობა მიიღოს პირმა, რომელსაც პირადი ინტერესი აქვს საქმის შედეგისადმი, საჩივრით ინიცირებული საქმისწარმოების მხარეა, ნათესაური, მეგობრული ან სხვა ახლობლური ურთიერთობა აქვს საქმისწარმოების ერთ-ერთ მხარესთან, გარდა თანამდებობრივი ურთიერთობისა. ინტერესთა კონფლიქტის წარმოქმნის შემთხვევაში საჩივრების განმხილველი ორგანოს წევრი ვალდებულია, თვითაცილება განაცხადოს. თუ ის არ განაცხადებს თვითაცილებას, მას შეიძლება აცილება მისცენ საქმისწარმოების მხარეებმა. განცხადება აცილების შესახებ დასაბუთებული უნდა იყოს. პირს, რომელსაც აცილება მისცეს, აცილების საკითხის განხილვამდე უფლება აქვს, მისცეს განმარტება. საჭიროების შემთხვევაში აცილებული პირის ჩანაცვლება უნდა მოხდეს აკადემიური საბჭოს მიერ რეკომენდირებული პირით.

საჩივრის სუბიექტი - ფორმალური საჩივრის წარდგენის უფლება აქვს ყველა დაინტერესებულ პირს, რომლის კანონიერ ინტერესზე გავლენას ახდენს სასწავლო უნივერსიტეტის მიერ გამოცემული ადმინისტრაციული აქტი ან სხვა ქმედება, სასწავლო უნივერსიტეტის ადმინისტრაციის წარმომადგენლის ან პროფესორ-მასწავლებლის ქმედება. საჩივრის წარდგენა უნდა მოხდეს სადაო ქმედების განხორციელებიდან ან ადმინისტრაციული აქტის გამოცემიდან 30 დღის ვადაში. გაშვებული ვადა უნდა აღდგეს, თუ 30-დღიანი ვადის გაშვება მოხდა ავადმყოფობის, სასწავლო უნივერსიტეტის ან სხვა საპატიო მიზეზით. სასწავლო უნივერსიტეტის ადმინისტრაციის წევრს არა აქვს უფლება, წარადგინოს საჩივარი მის მიერ ადმინისტრაციული ფუნქციების შესრულებასთან დაკავშირებით. წარმომადგენლობის უფლება - საჩივრის საფუძველზე ინიცირებული საქმისწარმოების მხარეს უფლება აქვს, საჩივართან დაკავშირებულ ნებისმიერ განხილვაზე თუ შეხვედრაზე გამოცხადდეს კანონიერი წარმომადგენლის ან დამცველის თანმხლებით.

მტკიცების ტვირთი და სტანდარტი - სტუდენტისა და პროფესორ-მასწავლებლის უფლებებითა და თავისუფლებებით სარგებლობისას მათი კანონიერება ივარაუდება და მათ შესახებ წარმოშობილი დავისას მტკიცების ტვირთი შეზღუდვის ინიციატორს ეკისრება. საჩივარი უნდა დაკმაყოფილდეს, თუ შეზღუდვის ინიციატორი ვერ შეძლებს სტუდენტის ან პროფესორმასწავლებლის მოთხოვნების უსაფუძვლოდ დამატკიცებას. საჩივრის განხილვა/გამოძიება და გადაწყვეტა - საჩივრების განხილვა/გამოძიება და გადაწყვეტა მაქსიმალურად სწრაფად და ეფექტურად უნდა მოხდეს. საჩივრის მიღებიდან სამი სამუშაო დღის ვადაში საჩივრების განმხილველი

ორგანოს თავმჯდომარე წერილობით დაუდასტურებს მომჩივანს საჩივრის მიღებას. საჩივრის მიღებიდან ხუთი დღის ვადაში საჩივრების განმხილველი ორგანოს თავმჯდომარე წერილობით განუმარტავს მომჩივანს სასწავლო უნივერსიტეტში მოქმედ საჩივრების პროცედურებს, ასევე შეატყობინებს მომჩივანს, მოპასუხეს, მოწმეებს, სხვა დაინტერესებულ პირებს და საჩივრების განმხილველი ორგანოს წევრებს საკითხის განხილვის დროსა და ადგილს.

საჩივრების განმხილველი ორგანოს თავმჯდომარე უზრუნველყოფს საჩივრის განხილვას მისი მიღებიდან ათი დღის ვადაში. საჩივართან დაკავშირებული ყველა დოკუმენტაცია უნდა გადაეცეს საჩივრების განმხილველი ორგანოს თითოეულ წევრსა და მეორე მხარეს საჩივრის განხილვამდე არაუგვიანეს ხუთი დღისა. იმ შემთხვევაში, თუ რომელიმე მხარეს სურს წარმოადგინოს დამატებითი მტკიცებულებები ან მოწმეები, საჩივრის განხილვა შეიძლება გადატანილ იქნეს გონივრული ვადით იმისათვის, რომ მეორე მხარემ მოამზადოს პასუხი დამატებით წარმოდგენილ მტკიცებულებებზე. საჩივრის განხილვიდან არაუგვიანეს 10 დღისა საჩივრების განმხილველი ორგანო გამოიტანს გადაწყვეტილებას. მიღებული გადაწყვეტილების შესახებ დაუყოვნებლივ უნდა ეცნობოს ორივე მხარეს. საჩივართან დაკავშირებით დამატებითი გამოძიების ჩატარების აუცილებლობისას საბოლოო გადაწყვეტილების მიღება უნდა მოხდეს საჩივრის წარდგენიდან არაუგვიანეს 30 დღისა. საჩივრების განმხილველი ორგანოს გადაწყვეტილება უნდა იყოს დასაბუთებული და ემყარებოდეს სასწავლო უნივერსიტეტის წესდების, შინაგანაწესის, დებულებისა და საქართველოს კანონმდებლობის მოთხოვნებს. დაუშვებელია, გადაწყვეტილების მიღებისას მხედველობაში იქნეს მიღებული ის მტკიცებულებები, რომლებიც არ იყო ხელმისაწვდომი მომჩივნის ან მოპასუხისთვის. საჩივართან დაკავშირებით საჩივრების განმხილველ ორგანოს გამოაქვს გადაწყვეტილება:

- საჩივრის დაკმაყოფილების შესახებ;
- საჩივრის დაკმაყოფილებაზე უარის თქმის შესახებ;
- საჩივრის ნაწილობრივ დაკმაყოფილების შესახებ.

ადმინისტრაციული საჩივარი - სტუდენტი, პროფესორ-მასწავლებელი ან სხვა დაინტერესებული პირი უფლებამოსილია, გაასაჩივროს სასწავლო უნივერსიტეტის მიერ გამოცემული ადმინისტრაციული აქტი. ადმინისტრაციული საჩივრის წარდგენის საფუძველი შეიძლება გახდეს აგრეთვე სტუდენტის ან პროფესორ-მასწავლებლის დისკრიმინაცია, მათი უფლებებისა და კანონიერი ინტერესების უკანონო შეზღუდვა. საჩივარი ასევე შეიძლება დაკავშირებული იყოს სასწავლო უნივერსიტეტის მიერ

საგანმანათლებლო ან სხვა სახის მომსახურების არაჯეროვან უზრუნველყოფასთან. ადმინისტრაციული საჩივრის წარდგენა აჩერებს გასაჩივრებული ადმინისტრაციული აქტის მოქმედებას, გარდა იმ შემთხვევისა, როდესაც ადმინისტრაციული აქტის მოქმედების შეჩერება გამოიწვევს მნიშვნელოვან მატერიალურ ზიანს ან საფრთხეს შეუქმნის სასწავლო უნივერსიტეტში არსებულ წესრიგს.

საჯაროობა და გამჭვირვალობა ადმინისტრაციული საჩივრის საფუძველზე ინიცირებული საქმისწარმოების ობიექტურად წარმართვის ერთერთი ძირითადი გარანტიაა. ამიტომ სასწავლო უნივერსიტეტი ვალდებულია, უზრუნველყოს ყველა დაინტერესებული პირის შესაძლებლობა, დაესწროს საჩივრების განმხილველი ორგანოს სხდომებს. ინფორმაცია ადმინისტრაციული საჩივრის საჯარო განხილვის ადგილისა და თარიღის შესახებ უნდა გამოქვეყნდეს და გავრცელდეს არანაკლებ 7 დღით ადრე საჩივრების განმხილველი ორგანოს სხდომის გამართვამდე. ასევე საჯაროდ უნდა გამოქვეყნდეს მის მიერ მიღებული გადაწყვეტილება.

აკადემიური საჩივარი - სტუდენტის აკადემიური მოსწრების შეფასება პროფესორ-მასწავლებლის დისკრეციას განეკუთვნება. საგანმანათლებლო ფუნქციების შესრულებაში, მათ შორის სტუდენტის ცოდნის შეფასებაში ჩარევისგან პედაგოგი დაცულია აკადემიური თავისუფლების პრინციპით. ამავე დროს, სასწავლო უნივერსიტეტს ეკისრება ყველა გონივრული ზომის მიღების ვალდებულება სტუდენტის ცოდნის სამართლიანი შეფასებისათვის. ამ მიზნით სასწავლო უნივერსიტეტი შეიმუშავებს სტუდენტის ცოდნის სამართლიანი შეფასების პროცედურებს.

თუ სტუდენტი გადაწყვეტს მიღებული შეფასების გასაჩივრებას, ის თავდაპირველად უნდა გაესაუბროს შესაბამის პროფესორ-მასწავლებელს, რათა გაარკვიოს ამ უკანასკნელის მიერ გამოყენებული ცოდნის შეფასების კრიტერიუმები და საკუთარი პრეტენზიების გონივრულობა. მხოლოდ ამის შემდეგ აქვს სტუდენტს უფლება, წარადგინოს ფორმალური საჩივარი. აკადემიური საჩივარი უნდა დაკმაყოფილდეს, თუ დადასტურდა, რომ სტუდენტის ცოდნის შეფასებისას პროფესორ-მასწავლებელმა ისეთი არამართლზომიერი ფაქტორებით იხელმძღვანელა, როგორცაა სტუდენტის შეხედულებები, ეთნიკური წარმომავლობა ან რელიგიური მრწამსი, ასევე თუ უხეშად იქნა დარღვეული ცოდნის შეფასების სტანდარტები შესაბამის აკადემიურ დისციპლინაში. აკადემიური საჩივრის დაკმაყოფილების საფუძველია აგრეთვე სასწავლო უნივერსიტეტის მიერ დადგენილი სტუდენტის ცოდნის სამართლიანი შეფასების პროცედურების დარღვევა.

საჩივარზე უარის თქმა - მომჩივანს უფლება აქვს, უარი განაცხადოს საკუთარ მოთხოვნებზე საჩივრების განმხილველი ორგანოს მიერ გადაწყვეტილების მიღებამდე.

უარი საჩივარზე წერილობით უნდა გაფორმდეს. საქმის ზეპირი განხილვისას მომჩივანი უფლებამოსილია, საჩივარზე უარი ზეპირადაც განაცხადოს. საჩივარზე უარის თქმა აჩერებს საქმისწარმოებას.

სასწავლო უნივერსიტეტის იურისდიქცია - სასწავლო უნივერსიტეტის საჩივრების განმხილველი ორგანო არ არის აღჭურვილი მნიშვნელოვანი საგამოძიებო უფლებამოსილებითა და სრულფასოვანი გამოძიების ჩატარებისათვის აუცილებელი უნარ-ჩვევებით. შესაბამისად, მის იურისდიქციას სცილდება სასწავლო უნივერსიტეტის ფარგლებში ჩადენილი სისხლის სამართლებრივი წესით დასჯადი ქმედების გამოძიება. ყოველი ამგვარი ფაქტი დაუყოვნებლივ უნდა ეცნობოს სამართალდამცავ ორგანოებს. სასწავლო უნივერსიტეტი აგრეთვე ვერ განიხილავს საჩივარს, თუ:

- არსებობს სასამართლოს გადაწყვეტილება დავის იმავე საგანზე;
- სასამართლო განიხილავს დავას იმავე მხარეებს შორის, იმავე საგანზე და იმავე საფუძველით;
- არსებობს სასწავლო უნივერსიტეტის საჩივრების განმხილველი ორგანოს მიერ მიღებული გადაწყვეტილება დავის იმავე მხარეებს შორის, იმავე საგანზე და საფუძველით;
- გასულია საჩივრის წარდგენის ვადა;
- საჩივარი შეტანილია არაუფლებამოსილი პირის მიერ.

საჩივრის ფორმა - საჩივარი უნდა იყოს წერილობითი ფორმის, შედგენილი ქართულ ენაზე . იმ შემთხვევაში, თუ საჩივარი ან განცხადება შედგენილია უცხო ენაზე, მომჩივანი ვალდებულია, დროის გონივრულ მონაკვეთში წარმოადგინოს მისი თარგმანი. წერილობითი საჩივარი ან განცხადება ფორმალური საქმისწარმოების დაწყების საფუძველია და უნდა შეიცავდეს დავის საგნის ზუსტ და მკაფიო აღწერილობას, ასევე სხვა დეტალებს საჩივრის წარდგენის თარიღის, მისი ავტორის სახელისა და გვარის ჩათვლით. საჩივრის ფორმა, ასევე მითითებები მისი შინაარსის შესახებ ფართოდ უნდა იყოს ხელმისაწვდომი.

საჩივარი უნდა შეიცავდეს შემდეგ მონაცემებს:

- მომჩივნის სახელი, გვარი და მისამართი;
- იმ პირის ვინაობა, რომლის ქმედებაც საჩივრდება;

- გასაჩივრებული ქმედება, ხოლო ადმინისტრაციული აქტის გასაჩივრების შემთხვევაში შესაბამისი ადმინისტრაციული აქტის ზუსტი სახელწოდება;
- უფლების ან კანონიერი ინტერესის დარღვევის მკაფიო აღწერილობა;
- არსებობის შემთხვევაში მოწმეთა ვინაობა;
- მოთხოვნა, იმ ზომების ჩამონათვალი, რომელთა მიღებასაც მოითხოვს მომჩივანი;
- არსებობის შემთხვევაში წარმომადგენლის ან დამცველის ვინაობა;

საჩივარზე თანდართული საბუთების ნუსხა და სხვა დოკუმენტური მტკიცებულებები.

- მომჩივნის დაცვის უზრუნველყოფა და აშკარად უსაფუძვლო საჩივრები - სასწავლო უნივერსიტეტის მმართველმა ორგანოებმა უნდა უზრუნველყონ კეთილსინდისიერი მომჩივნის დაცვა ყოველგვარი შურისძიების ან უკანონო ზემოქმედებისგან. საჩივართან დაკავშირებით ნებისმიერი ზემოქმედება მომჩივანზე ან მისი დაშინების მცდელობა დისციპლინური პასუხისმგებლობის დაკისრების საფუძველია. მხოლოდ

იმ შემთხვევაში, თუ დადასტურდება, რომ მომჩივნის მოთხოვნები აშკარად უსაფუძვლოა და ის ბოროტი განზრახვით მოქმედებდა, მის მიმართ შეიძლება განხორციელდეს დისციპლინური ზემოქმედების ღონისძიებები.

3. დისციპლინური დევნა

სასწავლო უნივერსიტეტის ერთ-ერთი ძირითადი ფუნქცია ისეთი აკადემიური გარემოს ფორმირებაა, რომელიც სასწავლო უნივერსიტეტის საზოგადოების წევრებს შორის ეთიკისა და მორალის ფასეულობების დანერგვას უწყობს ხელს. ამ ფუნქციის შესასრულებლად სასწავლო უნივერსიტეტი შეიმუშავებს შინაგანაწესს, რომელიც ითვალისწინებს სტუდენტისა და პროფესორ-მასწავლებლის დისციპლინურ პასუხისმგებლობას სასწავლო უნივერსიტეტის მიერ დადგენილი ქცევის წესებისა და დისციპლინის დარღვევისათვის.

საქართველოს კანონი «უმაღლესი განათლების შესახებ» ადგენს მინიმალურ მოთხოვნებს დისციპლინური დევნის მიმდინარეობისას სტუდენტისა და პროფესორ-მასწავლებლის უფლებებისა და კანონიერი ინტერესების დასაცავად. სტუდენტის ან პროფესორ-მასწავლებლის მიმართ დისციპლინური დევნა შეიძლება განხორციელდეს მხოლოდ

უმაღლესი საგანმანათლებლო დაწესებულების წესდებითა და შინაგანაწესით გათვალისწინებულ შემთხვევებში, ჯეროვანი და სამართლიანი პროცედურის საფუძველზე. ეს ნიშნავს, რომ სასწავლო უნივერსიტეტის წესდება და შინაგანაწესი არ უნდა შეიცავდეს ან ბუნდოვან დებულებებს და სტუდენტებსა და პროფესორმასწავლებლებს უნდა აძლევდეს საშუალებას, დაარეგულირონ საკუთარი ქცევა, აგრეთვე წინასწარ განსაზღვრონ მისი სამართლებრივი შედეგები.

სასწავლო უნივერსიტეტის წესდებითა და შინაგანაწესით დადგენილი მოთხოვნების დარღვევის საფუძველზე დისციპლინური დევნა და სახდელი უნდა იყოს გონივრული, დასაბუთებული და თანაზომადი. სასწავლო უნივერსიტეტს არა აქვს უფლება, დაადგინოს ისეთი წესები, რომლებიც თვითნებურია და არ უკავშირდება სასწავლო უნივერსიტეტის ლეგიტიმურ აღმზრდელობით ან საგანმანათლებლო ინტერესს, ეწინააღმდეგება საქართველოს კანონს „უმაღლესი განათლების შესახებ“ და უსამართლოდ ზღუდავს სტუდენტებისა და პროფესორ-მასწავლებლების უფლებებსა და კანონიერ ინტერესებს. სასწავლო უნივერსიტეტი ვალდებულია, წერილობითი ფორმით აცნობოს სტუდენტს ან პროფესორ-მასწავლებელს გადაწყვეტილება დისციპლინური დევნის დაწყების შესახებ, აგრეთვე განუმარტოს დისციპლინური გადაცდომის არსი და მის წინააღმდეგ არსებული მტკიცებულებები საქმის განხილვამდე გონივრული ვადით ადრე. გონივრულად ჩაითვლება ვადა, რომელიც საშუალებას მისცემს დისციპლინურ დევნაში მყოფ სტუდენტს ან პროფესორ-მასწავლებელს, სათანადოდ მოემზადოს დისციპლინური განხილვისათვის. სტუდენტსა და პროფესორ-მასწავლებელს უფლება აქვთ, მონაწილეობა მიიღონ საკითხის განხილვაში ან გადაწყვეტაში უშუალოდ ან წარმომადგენელთან ერთად, აგრეთვე წარმოადგინონ საკუთარი მტკიცებულებები და მოწმეები. სტუდენტისა და პროფესორ-მასწავლებლის დისციპლინური დევნის საკითხს წყვეტს აკადემიური საბჭო ან მის მიერ შექმნილი ორგანო, რომელიც აირჩევა ფაკულტეტის საბჭოს მიერ სასწავლო უნივერსიტეტის წესდებით გათვალისწინებული წესით. სტუდენტის ან პროფესორ-მასწავლებლის მიმართ დისციპლინური დევნის დაწყება არ უნდა ზღუდავდეს მათ უფლებას, მონაწილეობა მიიღონ სასწავლო პროცესში. დასაშვებია სტუდენტის დროებითი დათხოვნა ან პროფესორ-მასწავლებლის დროებით ჩამოშორება სამსახურებრივი მოვალეობების შესრულებისგან, თუ ის საფრთხეს უქმნის სხვების უფლებებს, ჯანმრთელობას, სასწავლო უნივერსიტეტის საკუთრებას, უსაფრთხოებასა და საგანმანათლებლო საქმიანობას. დაუშვებელია, დისციპლინური პასუხისმგებლობის საკითხი განიხილოს პირმა, რომელსაც პირადი ინტერესი აქვს საქმის შედეგისადმი ან რომელიც დისციპლინური საქმისწარმოების ერთერთი მხარეა. ასევე დაუშვებელია ნათესაური, მეგობრული ან სხვა ახლოობლური ურთიერთობის არსებობა საქმის განმხილველი ორგანოს წევრსა და დისციპლინური საქმისწარმოების მხარეებს შორის, გარდა თანამდებობრივი ურთიერთობისა. ინტერესთა კონფლიქტის წარმოქმნის

შემთხვევაში საქმის განმხილველი ორგანოს წევრი ვალდებულია, განაცხადოს თვითაცილება. თუ ის არ განაცხადებს თვითაცილებას, მას აცილება შეიძლება მისცენ საქმისწარმოების მხარეებმა. განცხადება აცილების შესახებ დასაბუთებული უნდა იყოს. პირს, რომელსაც აცილება მისცეს, აცილების საკითხის განხილვამდე უფლება აქვს, მისცეს განმარტება. დისციპლინური გადაცდომის საქმის განხილვა დახურულია, გარდა იმ შემთხვევისა, თუ დაზარალებული და ეჭვმიტანილი წერილობით თანხმობას განაცხადებენ სხდომის საჯაროდ წარმართვაზე. დისციპლინური გადაცდომის საქმის განხილვისას სტუდენტს და პროფესორ -მასწავლებელს უფლება აქვთ, გამოვიდნენ სიტყვით და წარმოადგინონ მტკიცებულებები და მოწმეები, აგრეთვე კითხვები დაუსვან მოწმეს ან დაზარალებულს. მოწმეები ვალდებული არიან, მისცენ ჩვენება და პასუხი გასცენ დასმულ შეკითხვებს. სტუდენტის ან პროფესორ-მასწავლებლის მიერ დისციპლინური გადაცდომის ჩადენის მტკიცების ტვირთი ეკისრება სასწავლო უნივერსიტეტს. სტუდენტს და პროფესორ-მასწავლებელს დუმილის უფლება აქვთ. მათ არ შეიძლება, მოეთხოვოთ რაიმე სახის განმარტების წარმოდგენა. დაუშვებელია, სტუდენტის ან პროფესორ-მასწავლებლის მიერ დუმილის უფლებით სარგებლობა დისციპლინური პასუხისმგებლობის დაკისრების ერთადერთი საფუძველი გახდეს. გადაწყვეტილება დისციპლინური პასუხისმგებლობის დაკისრების შესახებ უნდა იყოს დასაბუთებული და ემყარებოდეს მხოლოდ საქმის განმხილველი ორგანოს წინაშე წარმოდგენილ მტკიცებულებებს, რომლებიც დამაჯერებლად ადასტურებს სტუდენტის ან პროფესორ-მასწავლებლის მიერ სასწავლო უნივერსიტეტის შინაგანაწესისა და ქცევის სხვა წესების დარღვევის ფაქტს. დაუშვებელია ისეთი დისციპლინური სახდელის დაკისრება, რომელიც შეუსაბამოა ჩადენილი გადაცდომის ხასიათთან და სიმძიმესთან, აგრეთვე ლახავს პიროვნების პატივსა და ღირსებას. დისციპლინური სახდელის დაკისრებისას მხედველობაში უნდა იქნეს მიღებული სტუდენტის აკადემიური მოსწრება, ასევე სტუდენტისა და პროფესორ-მასწავლებლის წარსული ყოფაქცევა.

დაუშვებელია სასწავლო უნივერსიტეტის მიერ სტუდენტის ან პროფესორ-მასწავლებლის დისციპლინური დევნა იმ ქმედებისათვის, რომელიც მან ჩაიდინა სასწავლო დროისგან თავისუფალ დროს ან სასწავლო უნივერსიტეტის ტერიტორიის გარეთ, გარდა იმ შემთხვევისა, როდესაც სასწავლო უნივერსიტეტს დასაბუთებული ინტერესი აქვს. დასაბუთებული ინტერესი წარმოიქმნება მაშინ, როდესაც ჩადენილი ქმედება პირდაპირ კავშირშია სასწავლო უნივერსიტეტში არსებულ წესრიგთან, ზიანს აყენებს სტუდენტის ან პროფესორ-მასწავლებლის კანონიერ ინტერესებს და იკრძალება სასწავლო უნივერსიტეტის წესდებით ან შინაგანაწესით. ასევე დაუშვებელია სტუდენტის ან პროფესორ-მასწავლებლის დისციპლინური დევნა იმავე ქმედებისათვის, რომლისთვისაც ის უკვე მიცემულ იქნა სისხლისსამართლებრივ პასუხისგებაში.

დისციპლინური სახდელის ერთ-ერთ სახეს შეიძლება წარმოადგენდეს სტუდენტის ლექციიდან გაძევება. ამ დროს არ წარმოიქმნება დისციპლინური საქმისწარმოებისათვის

გათვალისწინებული დაცვის პროცედურული უფლებები, გარდა იმ შემთხვევისა, როდესაც გარემოება, რომელიც საფუძვლად დაედო გაძევებას, შეიძლება სტუდენტის სტატუსის შეწყვეტის ან სხვა უფრო მძიმე დისციპლინური სახდელის დაკისრების საფუძველი გახდეს. სტუდენტის ლექციიდან გაძევება დასაშვებია მხოლოდ იმ შემთხვევაში, თუ ის ხელს უშლის ლექციის ნორმალურ მიმდინარეობას და პროფესორ მასწავლებლის გადაწყვეტილება არ არის თვითნებური, არამედ სტუდენტის ქცევის ობიექტურ შეფასებას ემყარება. გადაწყვეტილება სტუდენტის ლექციიდან გაძევების შესახებ შეიძლება გასაჩივრდეს ფაკულტეტის საბჭოში.

დისციპლინური საქმისწარმოებისათვის გათვალისწინებული დაცვის პროცედურული უფლებები ასევე არ ვრცელდება იმ სტუდენტებზე, რომელთაც არადაამაკმაყოფილებელი აკადემიური მოსწრების გამო სასწავლო უნივერსიტეტიდან სტატუსის შეწყვეტა ემუქრებათ. ამავე დროს, სამართლიანი მოპყრობის პრინციპი გულისხმობს, რომ სასწავლო უნივერსიტეტი ვალდებულია იმოქმედოს ფრთხილად, დადგენილი პროცედურების შესაბამისად და მისცეს სტუდენტს განმარტების წარმოდგენის უფლება. გარდა ამისა, აუცილებელია სტუდენტის წინასწარი გაფრთხილება, რომ ცუდი აკადემიური მოსწრება შეიძლება მისი სტატუსის შეჩერების საფუძველი გახდეს.